

五

倫

書

五倫書卷之三十一

臣道

善行

劉正

漢王陵從高祖定天下。為人少文。任氣好直言。為右丞相。二歲。惠帝崩。高后欲立諸呂為王。問陵。陵曰。高帝刑白馬而盟曰。非劉氏而王者。天下共擊之。今王呂氏。非約也。太后不說。及問丞相平。絳侯勃等。皆曰。高帝定天下。王

子弟。今太后稱制。欲王昆弟諸呂。無所不可。太后喜。罷朝。陵讓平勃曰。始與高帝啖血而盟。諸君不在邪。今高帝崩。太后欲王呂氏諸君。縱欲阿意背盟。何面目見高帝於地下乎。劉章漢宗室也。封朱虛侯。章忿劉氏不得職。嘗入侍醺飲。高后令為酒吏。章自請曰。臣將種也。請得以軍法行酒。高后曰。可。酒酣。章進歌舞。已而曰。請為太后歌耕田。高后兒子畜之。笑曰。顧乃父知田耳。若生而王子。安知田。

手。章曰。知之。太后曰。試為我言田意。章曰。深耕概種。立苗欲疏。非其種者鋤而去之。太后嘿然。頃之。諸呂有一人醉亡酒。章追拔劔斬之。而還報曰。有亡酒一人。臣請行軍法斬之。太后大驚。已許其軍法。毋以罪。因罷酒。

申屠嘉。文帝時為丞相。為人廉直。入朝見太中大夫鄧通。居帝旁。有怠慢禮。嘉奏事畢。因言曰。陛下愛幸群臣。則富貴之。至於朝廷之禮。不可以不肅。帝曰。君勿言。吾私之。罷朝。嘉

坐府中。為檄召通詣丞相府。曰。不來且斬通。通至。免冠徒跣頓首謝。嘉坐自如。弗為禮。責曰。朝廷者。高皇帝之朝廷也。通小臣。戲殿上大不敬。當斬。吏今行斬之。通頓首出血。不解。帝度丞相已困通。乃使使持節召通而謝丞相。始釋之。

轅固。景帝時為博士。帝知固廉直。拜清河太傅。疾免。武帝即位。復以賢良徵。時固已九十餘矣。公孫弘亦徵。及目而事固。固曰。公孫子

務正學以言。無曲學以阿世。

汲黯武帝時為謁者。帝方招文學儒者。曰。吾欲云云。黯對曰。陛下內多慾而外施仁義。柰何欲效唐虞之治乎。帝怒。變色而罷朝。公卿皆為黯懼。帝退。謂人曰。甚矣汲黯之戇也。群臣或數黯。黯曰。天子置公卿輔弼之臣。寧令從諛承意。陷主於不誼乎。且已在位。縱愛身。柰辱朝廷何。黯多病。嚴助為請告。帝曰。汲黯何如人也。曰。使黯任職居官。無以瘡人。至其

輔少主守成深堅。雖自謂責育不能奪也。帝曰。然。古有社稷臣。黯近之矣。

龔遂以明經官至昌邑。郎中令事昌邑王賀。賀動作多不正。遂忠厚剛毅。有大節。內諫爭於王。外責傅相。引經義陳禍福。至於涕泣。蹇蹇亡已。面刺王過。王至掩耳起走。曰。郎中令善媿人。及國中皆敬憚焉。王嘗與騶奴宰人游戲飲食。賞賜無度。遂入見王。涕泣膝行。左右侍御皆出涕。王曰。郎中令何為哭。遂曰。臣

痛社稷危也。願賜清閒竭愚。王辟左右遂曰。大王親近群小。漸漬邪惡。存亡之機。不可不慎也。臣請選郎通經術有行義者與王起居坐。則誦詩書立則習禮容。宜有益。王許之。遂乃選郎中張安等十人侍王。數日王皆去。遂安等。昭帝崩。賀嗣立二十七日。以淫亂廢昌邑。群臣坐陷王於不道。皆誅死。唯遂以數諫爭得免焉。

蓋寬饒宣帝時為司隸校尉。刺舉無所迴避。

公卿貴戚及郡國吏繇使至長安皆恐懼莫敢犯禁。京師為清。平恩侯許伯入第。丞相御史將軍中二千石皆賀。寬饒不行。許伯請之。乃往。從西街上東嚮特坐。許伯自酌曰。蓋君後至。寬饒曰。無多酌我。我乃酒狂。丞相魏侯笑曰。寬饒醒而狂。何必酒也。坐者皆屬目卑下之。酒酣樂作。長信少府檀長卿起舞為沐猴與狗鬪。坐皆大笑。寬饒仰視屋而嘆曰。美哉。然富貴無常。忽則易人。此如傳舍。所閱多。

矣。唯謹慎為得久。君侯可不戒哉。因起趨出。
劾奏檀長卿失禮不敬之罪。

尹翁歸宣帝時拜東海太守。過辭廷尉于定
國。定國家在東海。欲屬託邑子兩人。命坐後
堂待見。定國與翁歸語終日。不敢見其邑子。
既去。定國乃謂邑子曰。此賢將。汝不任事也。
又不可干以私。

王尊。元帝時遷東平王相。先是東平王數出
入驅馳國中。與后姬家交通。尊到官。召勅厩

長曰。大王當從官屬鳴和鸞乃出。自今有令
駕小車。即叩頭爭之。言相教不得。後尊朝王。
王復延請登堂。尊謂王曰。尊來為相人皆弔
尊也。以尊不容朝廷。故見使尊相王耳。天下
皆言王勇。顧但負貴。安能勇如尊乃勇耳。王
變色視尊。意欲格殺之。即好謂尊曰。願觀相
君佩刀。尊舉掖顧謂傍侍郎前引佩刀視王。
曰。王欲誣相拔刀向王邪。王情得。又雅聞尊
高名。大為尊屈。酌酒具食。相對極歡。

王閔哀帝時為中常侍時倖臣董賢為大司馬寵愛貴盛帝臨崩以璽綬付賢曰無妄以與人時國無嗣主內外恒懼閔白太后請奪之即帶劔至宣德後闔舉手叱賢曰宮車晏駕國嗣未立公受恩深重當俯伏號泣何事久持璽綬以待禍至耶賢知閔必死不敢拒之乃跪授璽綬馳上太后朝廷壯之

董宣光武時為洛陽令寧平公主乳母子白日殺人因匿主家吏不能得及主出行以奴

驂乘宣於大夏門亭候之。駐車叩馬，以刀畫地。數主之失者三。叱奴下車格殺之。主即馳車入宮。帝大怒。召宣曰：「令欲死乎？」宣叩頭曰：「願一言死，無恨。」帝曰：「何言？」宣曰：「陛下聖德中興，而縱奴殺良民。以奴殺臣，臣死之後，陛下何以治天下？捶殺臣，不如臣自殺。即以頭擊楹，流血被面。」帝令小黃門持之，曰：「癡令。」令叩頭謝主。宣不從。帝曰：「頓癡令。」頭兩手據地，不肯低頭。帝勅強項令出，賜錢三十萬。

宋均。明帝時為尚書令。每有駁議。多合上旨。嘗剛剪疑事。帝以為有姦。大怒。收郎縛格之。諸尚書惶恐。皆叩頭謝罪。均顧厲色曰。忠臣執義。無有二心。若畏威失正。均雖死。不易志。帝聞。善其不撓。即令貫郎。

虞詡。順帝永建中。為司隸校尉。時中常侍張防。特用權勢。每請託受取。詡輒按之。而屢寢不報。詡不勝其憤。乃奏防曰。昔孝安皇帝。任用樊豐。遂交亂嫡統。幾亡社稷。今者張防復

弄威柄。國家之禍。將重至矣。臣不欲與防同
朝。以醜楊震之跡。謹自繫以聞。書奏。防流涕
訴帝。詔坐論輸左校。防必欲害之。二日之中。
傳考四獄。吏或勸其自引。詔曰。寧伏歐刀。以
示遠近。中常侍高梵為詡言枉狀。即日赦出
之。

張綱為御史。順帝遣八使循行風俗。綱獨埋
其車輪於洛陽都亭。曰。豺狼當路。安問狐狸。
遂奏大將軍梁冀。河南尹梁不疑等貪叨不

法書御京師震竦

范滂桓帝時冀州飢荒盜賊群起以滂為清
詔使按察之滂登車攬轡慨然有澄清天下
之志及至州境守令自知賊汙望風解印綬
去其所舉奏莫不厭塞衆議及為光祿勳主
事奏刺史二千石權豪之黨二十餘人尚書
責滂所劾猥多疑有私故滂對曰臣之所舉
自非叨穢姦暴深為民害豈以汙簡札哉臣
聞農夫去草嘉穀必茂忠臣除姦王道以清

若臣言有貳。甘受顯戮。吏不能詰。為鉤黨下獄。吏曰。諸入獄。當祭皋繇。以祈福。滂曰。皋繇古之賢臣。知滂無罪。將理之於天。如其有罪。祭之何益。及訊獄。王甫以次詰之。滂年少。在後。越次而前。甫曰。夫合黨連群。必有盟誓。其所謀圖。皆何等邪。滂曰。竊聞仲尼之言。見善如不及。見惡如探湯。欲使善善齊其情。惡惡同其行。謂王政之所急。不悟反以為黨。乃仰天歎曰。古之脩善。自求多福。今之脩善。乃陷

大戮死之日。願埋於首陽山側。上不負皇天。
下不愧夷齊。尚書霍諝以黨事無驗。表陳赦
之。

吳樹為宛令之官。辭大將軍梁冀。冀賓客布
在縣界。以情託樹。樹對曰。小人姦蠹。比屋可
誅。明將軍以櫛房之重。處上將之位。宜崇賢
善。以補朝闕。宛為大都士之淵藪。自侍坐以
來。未聞稱一長者而託非人。誠非敢聞。冀嘿
然不悅。樹到縣。遂誅殺冀客為人害者十數。

人

陳蕃桓帝時為樂安太守。時大將軍梁冀威震天下。遣書詣蕃有所請託。不得通。使者詐求謁。蕃怒。笞殺之。

奚延桓帝時為侍中。帝遊上林苑。從容問曰。朕何如主也。延對曰。陛下為漢中主。帝曰。何以言之。對曰。尚書令陳蕃任事。則治。中常侍預政。則亂。是知陛下可與為善。可與為非。帝曰。昔朱雲折檻。今侍中面稱朕違。敬聞闕矣。

賈琮靈帝中平間沙汰刺史二千石更選清
能吏以琮為冀州刺史之部升車言曰刺史
當遠視廣聽糾察美惡何有反垂帷裳以自
掩塞乎乃命御者褰之百城聞風自然竦震
其諸賊過者望風解印綬去

李熒靈帝朝為議郎會西羌及邊章韓遂作
亂隴右徵發天下役賦無已司徒崔烈以為
宜棄涼州熒厲色言曰斬司徒天下乃安尚
書楊贊奏熒廷辱大臣帝以問熒熒曰涼州

天下衝要國家藩衛。今牧御失利。使一州叛逆。烈為宰相。不念為國思所以弭之之策。乃欲割棄一方萬里之土。臣竊惑焉。若烈不知是極蔽也。知而故言是不忠也。帝從燮議。由是朝廷重其方畧。

孔融為將作大匠。恒守正。素術僭亂。曹操託以楊彪與術婚姻。誣以欲圖廢置。奏收下獄。劾以大逆。融聞之不及朝服。往見操曰。楊公四世清慎。海內所瞻。周書父子兄弟罪不相

及況以素氏歸罪之乎。操曰。此國家之意。融曰。假使成王殺召公。周公可得言不知耶。簪纓縉紳。所以瞻仰明公者。以公聰明仁智。輔相漢朝。舉直錯枉。致之雍熙。今橫殺無辜。則海內觀聽。莫不解體。孔融魯國男子。便當拂衣而去。操不得已。遂理出彪。

三國吳張昭為輔吳將軍。每朝見。言論辯氣壯厲。義形於色。曾以直言逆旨。不進見。後蜀使來。稱蜀德美。而群臣莫拒。孫權嘆曰。使張公

王倫書卷三十一
在坐。彼不折則廢。安得復自諄乎。明日遣中使勞問。因請見。昭避席曰。昔太后桓王。不以老臣屬陛下。而以陛下屬老臣。臣是以思盡臣節以報厚恩。若乃變易思慮。以偷榮取容。此臣所不能也。權辭謝焉。

晉卞壺。明帝時為御史中丞。以褒貶為己任。欲軌正督世。不肯苟同時好。阮孚每謂之曰。卿常無閑泰。常如含瓦石。不亦勞乎。壺曰。諸君以道德恢弘。風流相尚。執鄙吝者。非壺而誰。

時貴遊子弟多慕王澄。謝鯤為達。壺屬色於朝。曰。悖禮傷教。罪莫斯甚。中朝傾覆。實由於此。欲奏推之。王導庾亮不從。乃止。然而聞者莫不折節。

後魏東平王建扶。性耿介。有氣節。宣武即位。累遷給事黃門侍郎。時鮑皓始有寵。百寮微憚之。帝曾於山陵還。詔建扶陪乘。命皓登車。皓將上。建扶諫。帝令推下之。當時壯其忠蹇。高恭之。為御史中尉。時莊帝姊壽陽公主行。

王伯書卷三十一
犯清路。執赤棒卒呵之不止。恭之令卒棒破其車。公主深以為恨。泣以訴帝。帝謂之曰。高中尉清直之人。彼所行者公事。豈可以私恨責之也。帝深致慰焉。

隋韋雲起。高祖時為符璽直長。兵部尚書柳述尚蘭陵公主。怙寵使氣。自楊素之屬皆下之。帝嘗問雲起外間不便事。述時侍側。雲起曰。柳述驕豪。未曾經事。兵機要重。非其所堪。臣恐物議以為陛下官不擇賢。專私所愛。斯亦

不便之大者。高祖甚然之。顧謂述曰。雲起之言。汝藥石也。可師友之。

劉行本仕隋為太子左庶子。時唐令則亦為左庶子。太子勇昵狎之。每令以絃歌教內人。行本責之曰。庶子當匡太子以正道。何有嬖昵房帷之間哉。令則甚慚而不能止。左衛率長史夏侯福亦為太子所昵。嘗於閣內與太子戲。福大笑。聲聞于外。行本時在閣下。聞之。待其出。數之曰。殿下寬容。賜汝顏色。汝何物。

小人敢為褻慢。因付執法者治之數日。太子為福致請。乃得釋。太子嘗得良馬。令福乘而觀之。太子甚悅。因欲行本復乘之。行本不從。正色而進曰。至尊置臣於庶子之位者。欲令輔導殿下以正道。非為殿下作弄臣也。太子慚而止。及太子廢。行本已卒。文帝曰。使劉行本在。勇當不及於此。

唐柳範為侍御史。奏禪吳王恪好田獵。損居人田苗。太宗因謂侍臣曰。權萬紀事我兒不能

輔正其罪合死。範進曰。房玄齡事陛下猶不能諫止田獵。豈可獨罪萬紀乎。

劉仁軌。太宗時為陳倉尉。時部人折衝都尉魯寧豪縱犯法。縣莫敢屈。仁軌約不再犯。而寧暴橫自如。仁軌榜殺之。州以聞。帝曰。尉而殺吾折衝可乎。召詰讓仁軌。對曰。寧辱臣。臣故殺之。帝以為剛正。

韋思謙。高宗時為御史大夫。性褻謬。顏色莊重。不可犯。見王公未嘗屈禮。或以為譏。荅曰。

耳目官故當特立。鵠鶚鷹鷂豈衆禽之偶。柰何屈以狎之。

王義方。高宗朝為侍御史。以彈李義府貶萊州司戶參軍。將行。義府謂之曰。王學士得御史。是義府所舉。今日豈無愧乎。對曰。義方為公不為私。昔孔子為魯司寇七日而誅少正卯於兩觀之下。今義方任御史旬有六日。不能除姦臣於雙闕之前。實以為媿。

宋璟。武后時為御史中丞。有人為飛書告張

易之兄弟謀反。許州人楊元嗣告昌宗嘗召術士李弘泰占相。弘泰亦言昌宗有天子相。武后命司刑卿崔承慶及璟鞠之。承慶言昌宗款稱弘泰語已奏聞。準法首原。璟奏昌宗為飛書所逼。不得已自首。且謀反大逆。無容首免。武后溫言解之。璟聲色愈厲。曰臣知言出禍隨。然義激於心。雖死不恨。武后不悅。楊再思遽宣勅命出。璟曰。聖主在此。不煩宰相擅宣勅命。武后乃可其奏。遣昌宗詣臺。璟廷

立而按之事未畢。武后特勅赦之。璟歎曰。不
先擊小子。腦裂。負此恨矣。武后使昌宗詣璟。
謝。璟拒不見。玄宗時。為黃門監。王毛仲以嚴
察幹力有寵。百官附之。輻輳。毛仲嫁女。帝問
何須。毛仲頓首謝曰。臣萬事已備。但未得客。
帝曰。知卿所不能致者一人耳。必宋璟也。朕
為汝召客。明日詔宰相與諸達官詣之。日中
璟乃至。先執酒西向拜謝。飲不盡觴。遽稱腹
痛而歸。

尹思貞。睿宗時召授將作大匠。僕射竇懷貞護作金仙玉真觀。廣調夫匠。思貞數有損節。懷貞讓之。思貞曰。公輔臣也。不能宣贊王化。而土木是興。以媚上害下。又聽小人譖。以廷辱士。今不可事公矣。乃拂衣去。帝知之。特詔令視事。

顏真卿。代宗時為尚書右丞。帝自陝還。真卿請先謁陵廟而即宮。宰相元載以為迂。真卿怒曰。用舍在公。言者何罪。然朝廷事豈堪公

再破壞邪。載銜之。

張濬僖宗時為諫議大夫。時王敬武在平盧軍最強。累召不肯應。濬往說之。而敬武已臣賊。不迎使者。濬責之曰。公為天子守藩。今使者齎詔至。不北面俯伏。而敢侮慢。公乃未識君臣大分。何以長吏民哉。敬武愕眙愧謝。宋姚坦為益王府翊善。坦性木強。王嘗於府中為假山。費數百萬。既成。置宴召諸臣觀之。坦獨俛首。王強使視之。曰。但見血山耳。王驚問。

故坦曰。在田舍時見州縣催租捕人父子兄弟送縣鞭笞流血被體。此假山皆民租稅為之。非血山而何。是時太宗亦為假山。聞而毀之。

寇準。太宗時為尚書虞部郎中樞密院直學士。天旱。帝延近臣問時政得失。準對曰。洪範天人之際。應若影響。大旱之證。蓋刑有所不平也。帝怒。問準所以不平狀。曰。願召二府至。臣即言之。有詔召二府入。準曰。頃者祖吉王

淮皆侮法受賂。言賊少乃伏誅。淮以叅政汚之弟盜主守財至千萬。止杖。仍復其官。非不平而何。帝因切責汚而知準為可用矣。

包拯。仁宗時召知開封府。遷右司郎中。拯立朝剛毅。貴戚權臣為之斂手。聞者皆憚之。人以包拯笑比黃河清。童稚婦女亦知其名。呼曰包待制。京師為之語曰。關節不到。有閻羅包老。

韓絳。神宗時為相。三司使穀市易官罪。而同

列佑之欲弗責。方創賈人免行錢。孫永議有異。而同列欲論永罔上。故不實。上書人鄭俠激切下獄。而執政馮京嘗賙俠。同列欲以黨俠為重坐。絳辯帝前不得直。數求罷。帝為逐市易官。稍寬二臣者。而他相至。欲復留。故賈人劉佐任市易。絳因言不可。論帝前未決。絳再拜曰。臣言不用。辱相位。請從此辭。帝愕曰。茲小事。何必爾。絳奏曰。小事弗伸。況大事乎。帝為罷佐。遣使持手札諭絳使就位。乃起。後

數月固稱疾。拜觀文殿大學士。禮部尚書知許州。

劉摯。神宗時為御史。與中丞楊繪言。助役有十害。王安石使曾布作十難以詰之。仍詰二人。向背好惡之情。果何所在。繪惶恐請曰。臣愚不知助役之利。乃爾。當伏妄言之罪。摯奮曰。為人臣。豈可壓於權勢。使人主不知利害之實。即復條對布所難者。以伸前議。且曰。臣所向者陛下。所背者權臣。所好者忠直。所惡

者邪姦。臣今獲罪。譴逐固自其分。但助役終為天下患害。願陛下勿忘臣言也。

李周。神宗時通判施州。司馬光將薦為御史。欲使來見。周曰。司馬公之賢。吾固願見。但聞薦而往。所謂呈身御史也。卒不往。帝詔近臣舉士。孫固以周聞。帝召對。謂曰。知卿不游權門。識今執政乎。對曰。不識也。識司馬光乎。曰。不識也。訪禦邊之術。曰。四邊手足耳。若疲中國。以勤遠畧。致百姓窮困。聚為盜賊。懼成腹

心之憂。帝領之。翌日語固曰。李周樸忠之士也。

梁肅括宗時拜尚書左丞。以與同列議夏國地界不能合。遂丐去。帝遣近臣問所以去意。且令密訪人才。肅曰。信任不篤。言不見聽。而詢問人才。非臣所敢當也。使者再至。乃言人才可大任者。陛下自知之。但須識別邪正。公天下之善惡。圖任舊人不牽左右好惡之言。以移聖意。天下幸甚。

邵伯溫為西京教授。紹聖初，章惇為相，惇嘗事伯溫父雍。欲用伯溫，伯溫不往。會法當赴吏部銓，程頤謂伯溫曰：「吾危子之行也。」伯溫曰：「豈不欲見先公於地下耶？」至則先就部擬官。而後見宰相，惇論及康節之學，曰：「嗟乎！吾於先生不能卒業也。」伯溫曰：「先君先天之學，論天地萬物，未有不盡者，其信也。則人之仇怨反覆者，可忘矣。」時惇方興黨獄，故以是動之。惇悚然，猶薦之於朝。而伯溫顛補郡縣吏。

三傳書卷三十一
惇不悅。遂得監永興軍鑄錢監。時元祐諸賢方南遷。士鮮訪之者。伯溫見范祖禹於咸平。見范純仁於潁昌。或為之恐不顧也。

晏敦復高宗時為左司諫兼權給事中。時秦檜方主和。力贊屈已之說。然患外議未敢行。勾龍如淵說檜請擇人為臺官。使擊去異論。則事遂矣。於是如淵施庭臣莫將皆據要地。人皆駭愕。敦復上疏言。前日如淵以附會和議得中丞。今施庭臣又以此躋橫榻。莫將又

以此擢右史。夫如淵庭臣庸人。莫將則姦人
也。陛下柰何與此輩斷國論乎。乞加斥逐。杜
群枉門。檜使所親諭敦復曰。公能屈從。兩地
旦夕可至。敦復曰。吾終不為自計。誤國家。況
吾薑桂之性。老而愈辣。請勿復言。檜卒不能
屈。

潘良貴。高宗時除考功郎。遷左司。宰相呂頤
浩從容謂良貴曰。旦夕相引入兩省。良貴正
色對曰。親老方欲乞外。兩省官非良貴可為。

也。退語人曰。宰相進退一世人才。以為賢耶。自當擢用。何可握手密語。先示私恩。若士大夫受其牢籠。又何以立朝。即日乞補外。以直龍圖閣知嚴州。

顏師魯。孝宗時為監察御史。遇事盡言。無所阿撓。有自外府得內殿宣引。且將補御史闕。負師魯亟奏。昔宋璟召自廣州道中。不與楊思勗交一談。李鄲恥為吐突承璀所薦。堅辭相位不拜。士大夫未論其才。立身之節。當以

璟。鄙為法。今其人朋邪偽迹。人所切齒。縱朝廷乏材。寧少此輩乎。臣雖不肖。羞與為伍。命乃寢。

呂祖泰。婺州處士。寧宗時。將降詔貶周必大為少保。祖泰聞之而憤。乃詣登聞鼓院上書論韓侂冑有無君之心。請誅之。以防禍亂。故大臣在者。獨周必大可用。宜以代之。書出。中外大駭。有旨配欽州。既至府廷。尹曰。誰教汝共為章。祖泰笑曰。公何問之愚也。吾固知必

死。而可受教於人。且與人議之乎。尹曰。汝病風喪心邪。祖泰曰。以吾觀之。若今之附韓氏得美官者。乃病風喪心耳。祖泰既貶。未幾。侂冑誅。詔祖泰特補上州文學。

楊萬里寧宗朝以崇文閣待制致仕。韓侂冑用事。欲網羅四方知名士。相羽翼。嘗築南園。屬萬里為之記。許以掖垣。萬里曰。官可棄。記不可作也。侂冑恚。改命他人。

陳文龍咸淳五年廷對第一。丞相賈似道愛

其文雅禮重之。由鎮東軍節度判官數年。拜
監察御史。皆出似道力。先是似道所置臺諫
皆闕茸。臺中相承凡有建。曰皆呈稿。至文龍
獨不呈稿。已忤似道。范文虎總師無功。似道
茫之以知安慶。又除趙潛知建康。黃萬石知
臨安。文龍言文虎失襄陽。今反見擢用。是當
罰而賞也。潛乳臭小子。何以任大閫之寄。萬
石政事怠荒。以為京尹。何以能治。請皆罷之。
似道大怒。黜文龍知撫州。

金程震宣宗興定初召拜監察御史時皇子荆王為宰相家僮革席勢侵民震以法劾之奏曰荆王以陛下之子任天下之重不能上贊君父同濟艱難顧乃恃權廢禮侵漁細民名為和市其實脅取陛下不能正家而欲正天下難矣於是上責荆王出內府銀以償物直杖大奴尤不法者數人

元耶律楚材太宗時為中書令有二道士爭長互立黨與其一誣其仇之黨二人為逃軍結

中貴及通事楊惟忠執而虐殺之。楚材按收
惟忠。中貴復訴楚材違制。帝怒擊楚材。既而
自悔。命釋之。楚材不肯解縛。進曰。臣備位公
輔。國政所屬。陛下初令繫臣。以有罪也。當明
示百官。罪在不赦。今釋臣。是無罪也。豈宜輕
易反覆如戲小兒。國有大事。何以行焉。衆皆
失色。帝曰。朕雖為帝。寧無過舉耶。乃溫言以
慰之。

廉希憲。世祖至元初。拜中書平章政事。每奏

帝前論事激切無少回惜。帝曰：卿昔事朕王府，多所容受。今為天子臣，乃爾木強耶？希憲對曰：王府事輕，天下事重。一或面從，天下將受其害。臣非不自愛也。

徹里燕只吉台氏至元間擢任利用監。時桑哥為相，引用黨與。鈞考天下錢糧，行省乘風督責尤峻。主無所償，則責及親戚。或逮繫隣黨，械禁榜掠，民不勝其苦。自裁及死獄者以百數。中外騷動。廷臣顧忌，皆莫敢言。徹里乃

於世祖前具陳桑哥姦貪誤國害民狀詞語激烈帝怒謂其毀詆大臣失禮體命左右批其頰徹里辯愈力且曰臣與桑哥無讎所以力數其罪而不顧其身者正為國家計爾苟畏聖怒而不復言則姦臣何由除民患何由息且使陛下有拒諫之名臣竊懼焉於是帝大悟即命帥羽林三百人往籍其家得珍寶如內藏之半桑哥既誅諸枉繫者始得釋星吉順帝至正初移湖廣行省平章政事湖

廣地連江北。威順王歲嘗出獵。又起廣樂園。多萃名倡。臣賈以網大利。民病之。有司莫敢言。星吉至。責王曰。王。帝室之懿。古之所謂伯父叔父者也。今德音不聞。而騁獵宣淫。賈怨於下。恐非所以自貽多福也。王謝之。悉罷其所以為

張翥。至正中為翰林學士承旨。字羅帖木兒。以兵犯關。逼帝削奪擴廓帖木兒官爵。且發兵討之。命翥草詔。毅然不從。左右或勸之。翥

曰。吾臂可斷。筆不能操也。帝知其意不可奪。
乃命他學士為之。

五倫書卷之三十一

五倫書卷之三十二

臣道

善行

諫諍

夏五子者太康之弟也太康尸位以逸豫滅厥德五子述大禹之戒作歌以諷之曰皇祖有訓民可近不可下民惟邦本本固邦寧予視天下愚夫愚婦一能勝予一人三失怨豈在明不見是圖予臨兆民凜乎若朽索之馭六

馬為人上者。柰何不敬。

關龍逢桀之臣也。桀為酒池糟丘。龍逢諫曰。為人君身行禮義。愛民節財。故國安而身壽也。今君用財若恐不能盡。用人若恐不能死。不單。天禍必降。而誅必至矣。君其革之。立而不去朝。桀因囚拘之。○桀觀炮烙於瑤臺。謂龍逢曰。樂乎。龍逢曰。樂。桀曰。觀刑何無惻怛之心。龍逢曰。天下苦之。而君以為樂。臣君之股肱。何不悅乎。桀曰。聽子諫。諫得我改之。諫

不得我刑之。龍逢曰。臣觀君冠危石也。臣觀君履春冰也。未有冠危石而不墜。蹈春冰而不陷。桀笑曰。是日亡。則與俱亡。子知我之亡。而不知自亡乎。子就炮烙之刑。吾觀子。龍逢遂赴火而死。

殷箕子紂之親戚。紂始為象箸。箕子歎曰。彼為象箸。必為玉杯。為玉杯。必思遠方珍恠之物。輿馬宮室之漸。自此始。不可振也。紂為淫佚。箕子諫不聽。人或曰。可以去矣。箕子曰。為人

臣諫不聽而去。是彰君之惡而自說於民。吾不忍為也。乃被疑佯狂而為奴。

王子比干紂之親戚。見箕子諫不聽而為奴。則曰。君有過而不以死爭。則百姓何辜。乃直言諫紂。紂怒曰。吾聞聖人之心有七竅。信有諸乎。乃殺比干。剝視其心。武王由是伐紂。

周芮良夫因厲王好利近榮夷公。良夫諫曰。榮公好專利而不知大難。夫利。百物之所生也。天地之所載也。而或有專之。其害多矣。天地

百物皆將取焉。何可專也。所怒甚多而不備。大難。以是教王。王其能久乎。夫王人者。將導利而布之上下者也。使神人百物無不得其極。猶日怵惕懼怨之來也。故頌曰。思文后稷。克配彼天。立我烝民。莫匪爾極。大雅曰。陳錫載周。是不布利而懼難乎。故能載周以至于今。今王學專利其可乎。匹夫專利。猶謂之盜。王而行之。其歸鮮矣。王不聽。卒以榮公為卿士。諸侯不享。王流于彘。

列國衛史鰭為大夫。事靈公。數諫靈公。請用蘧伯玉。退彌子瑕。不聽。及病。謂其子曰。我即死。置屍北堂於我足矣。吾既不能進蘧伯玉而退彌子瑕。是不能正君也。生不能正君。死不當成禮。既死。公往弔。見喪在北堂。問其故。其子具父言以對。公寤然失位曰。夫子生則欲進賢而退不肖。死且不懈。又以屍諫。可謂忠矣。於是乃召伯玉以為卿。退子瑕。徙喪正堂。成禮而後反。

魯臧僖伯為大夫。隱公將如棠觀魚。僖伯諫曰。凡物不足以講大事。其材不足以備器用。則君不舉焉。君將納民於軌物者也。故講事以度軌量。謂之軌。取材以章物采。謂之物。不軌不物。謂之亂政。亂政亟行。而以敗也。故春蒐。夏苗。秋獮。冬狩。皆於農隙以講事也。三年而治兵。入而振旅。歸而飲至。以數軍實。昭文。章明。貴賤。辨等列。順少長。習威儀也。鳥獸之肉。不登於俎。皮革齒牙骨角毛羽。不登於器。

則公不射。古之制也。若夫山林川澤之實。器用之資。皂隸之事。官司之守。非公所及也。公曰。吾將略地焉。遂往陳魚而觀之。僖伯稱疾不從。

齊晏嬰相景公。公有馬。其圉人殺之。公怒。援戈自擊之。嬰曰。此不知其罪而死。臣請為君數之。令知其罪而殺之。公曰諾。嬰舉戈臨之曰。汝為吾君養馬而殺之。而罪當死。汝使吾君以馬之故殺圉人。而罪又當死。汝使吾君

以馬故殺人。聞於四隣諸侯。汝罪又當死。公曰。夫子釋之。勿傷吾仁也。

顏蠋。齊臣也。景公遊於海上而樂之。六月不歸。令左右曰。敢有先言歸者。致死不赦。蠋趨進諫曰。君樂治海上。六月不歸。彼儻有治國者。君且安得樂此也。景公援戟將斫之。蠋趨進撫衣待之曰。君奚不斫也。昔者桀殺關龍逢。紂殺王子比干。君之賢非此二主也。臣之才非此二子也。君奚不斫。以臣參此二人者。

不亦可乎。景公說。遂歸。

漢樊噲。高帝時封舞陽侯。帝有疾。惡見人。詔戶者毋得入羣臣。十餘日。噲排闥直入。大臣隨之。帝獨枕一宦者臥。噲等流涕曰。始陛下與臣等起豐沛。定天下。何其壯也。今天下已定。又何憊也。且獨不見趙高之事乎。帝笑而起。絳孫通為太傅。高帝欲立趙王。廢太子。通進諫曰。昔晉獻公以驪姬故。廢立太子。晉國亂者數十年。秦不早定扶蘇。終使滅祀。今太子

仁孝。陛下必欲廢嫡立庶。臣願先伏誅。以頸血汙地。帝曰。公罷。吾戲耳。通曰。太子天下本。本一搖。天下振動。柰何以天下戲乎。

張釋之為謁者。僕射。從文帝登虎圈。帝問上林尉禽獸簿。十餘問。尉左右視。不能對。虎圈嗇夫從旁代尉對。甚悉。帝曰。吏不當如此耶。尉亡賴。詔釋之拜嗇夫為上林令。釋之前曰。陛下以絳侯周勃何如人。帝曰。長者。復問東陽侯張敖如何如人。帝復曰。長者。釋之曰。此

兩人言事曾不能出口。豈效此畱夫喋喋利口捷給哉。陛下以畱夫口辯而超遷之。臣恐天下爭口辯亡其實。帝曰善。迺止。不拜畱夫。袁盎為中郎將。文帝嘗從霸陵欲西馳下峻阪。盎攬轡。帝曰。將軍怯耶。盎曰。千金之子不垂堂。百金之子不騎衡。聖主不乘危。不傲幸。今陛下騁六飛。馳不測山。有如馬驚車敗。陛下縱自輕。柰高廟太后何。帝乃止。

郅都為中郎將。嘗從景帝入上林。賈姬在廁。

野彘入廁。帝欲自持兵救姬。都伏帝前曰。亡一姬。復一姬進。天下所少。寧姬等耶。陛下縱自輕。柰宗廟太后何。帝還。彘亦不傷姬。太后聞之。賜都金百斤。帝亦賜金百斤。由是重都。東方朔事武帝。有殺上林鹿者。帝大怒。下有司殺之。群臣皆相阿曰。殺人主鹿。大不敬。當死。東方朔時在傍曰。是人罪當死者三。使陛下以鹿之故殺人。一當死。使天下聞之。皆以陛下重鹿賤人。二當死。匈奴即有急。推鹿觸

之。三當死也。帝默然。遂釋其罪。

司馬相如嘗從武帝至長楊獵。帝方好自擊熊羆馳獸。相如諫曰。臣聞物有同類而殊能者。故力稱烏獲。捷言慶忌。勇期賁育。臣之愚以為人誠有之。獸亦宜然。今陛下好陵阻險。射猛獸。卒然遇軼材之獸。駭不存之地。犯屬車之清塵。是胡越起於轂下。而羌夷接軫也。帝善之。

魏相為丞相時。後將軍趙充國等議欲因匈

奴衰弱出兵擊其右地。相上書諫曰。臣聞之。
救亂誅暴。謂之義兵。兵義者王。敵加於已。不
得已而起者。謂之應兵。兵應者勝。爭恨小故。
不忍憤怒者。謂之忿兵。兵忿者敗。利人土地。
寶貨者。謂之貪兵。兵貪者破。恃國家之大。矜
人民之衆。欲見威於敵者。謂之驕兵。兵驕者
滅。此五者非但人事。乃天道也。匈奴未有犯
於邊境。今聞諸將軍欲興兵入其地。臣愚不
知此兵何名也。今郡國守相多不實選風俗。

尤薄。水旱不時。案今年計子弟殺父兄。妻殺夫者。凡二百二十二人。臣愚以為此非小變也。左右不憂。乃欲報織芥之忿於遠夷。願陛下與列侯及有識者詳議。乃可。帝從相言而止。

薛廣德為御史大夫。直言諫爭。始拜旬日。元帝幸甘泉。郊泰畤。禮畢。因留射獵。上書諫曰。竊見關東困極。人民流離。陛下日撞亡秦之鍾。聽鄭衛之樂。臣誠悼之。今士卒暴露。從官

勞倦。願陛下亟返宮。思與百姓同憂樂。天下幸甚。帝即日還。其秋耐祭宗廟。帝出便門。欲御樓船。廣德當乘輿車。免冠頓首曰。宜從橋。詔曰。大夫冠。廣德曰。陛下不聽臣。臣自刎。以血汙車輪。陛下不得入廟矣。帝不悅。光祿大夫張猛進曰。臣聞主聖臣直。乘船危。就橋安。帝曰。曉人不當如是耶。乃從橋。

谷永為大司農。成帝好微行不止。永諫曰。陛下棄萬乘之至尊。樂家人之賤事。厭高美之

尊號好匹夫之卑業。使供衛之臣執干戈守
空宮。使公卿百僚不知陛下所在。忽有變將
柰社稷何。帝歛容而止。

朱雲成帝時為槐里令。安昌侯張禹以帝師
位特進。依違任事。甚尊重。雲上書求見。公卿
在前。雲曰。今朝廷大臣上不能匡主。下無以
益民。皆尸位素餐。孔子所謂鄙夫。不可與事
君者也。臣願賜上方斬馬劍。斷佞臣一人頭
以厲其餘。帝問誰也。對曰。安昌侯張禹。帝大

怒曰。小臣居下。訕上。廷辱師傅。罪死不赦。御史將雲下。雲攀殿檻。檻折。雲呼曰。臣得下從龍。逢比干。遊於地下。是矣。未知聖朝何如耳。御史將雲去。左將軍辛慶忌叩頭流血爭之。帝意乃解。及當治檻。帝曰。勿易。因而葺之。以旌直臣。

母將隆。哀帝時為執金吾。侍中董賢方貴。帝使中黃門發武庫兵前後十輩送賢及乳母王阿舍。將隆奏曰。武庫兵器。天下公用。國家

武備繕治造作。皆度大司農錢。大司農錢自乘輿不以給共養。共養勞賜一出少府。蓋不以本藏給末用。不以民力供浮費。別公私。示正路也。今賢等便僻弄臣。私恩微妾。而以天下公用給其私門。契國威器共其家備。非所以示四方也。孔子曰。奚取於三家之堂。臣請收還武庫。

鄭崇哀帝時為尚書僕射。帝欲封祖母傅太后從弟商。崇諫曰。孝成皇帝封親舅五侯。天

為赤黃晝昏。日中有黑氣。今祖母從昆弟二人已侯。孔鄉侯皇后父為高武侯。以三公封。尚有因緣。今無故欲復封商。壞亂制度。逆天人心。非傅氏之福也。後傅太后終以專恣貶。號傅氏皆免官爵。歸故郡。

鮑宣事哀帝為諫大夫。見董賢貴倖。上書諫曰。侍中駙馬都尉董賢。本無葭莩之親。但以令色諛言。自進賞賜。亡度。并合三第。尚以為小。復壞暴室。坐使天子使者將作治第。行夜。

吏卒皆得賞賜。上冢有會。輒大官為供。海內
貢獻當養一君。今乃盡之賢家。豈天意與民
意邪。天不可久負。厚之如此。反所以害之也。
誠欲哀賢。宜為謝過天地。解讎海內。免遣就
國。收乘輿器物還之。縣官如此。可以終其性
命。不則海內之所仇。未有得久安者也。帝嘉
納。宣言。

張皓為司空。順帝時。清河趙騰上言。災變譏
刺朝政。章下有司。收騰繫考。所引黨輩八十

餘人皆以誹謗當伏重法。皓上疏諫曰。臣聞堯舜立敢諫之鼓。三王樹誹謗之木。春秋採善書惡。聖主不罪芻蕘。騰等雖干上犯法。所言本欲盡忠正諫。如當誅戮。天下杜口。塞諫爭之源。非所以昭德示後也。帝乃悟。減騰等罪。

三國。魏辛毗為侍中。時文帝欲徙士卒家十萬戶實河南。時蝗旱民饑。群臣以為不可。而帝意甚盛。皆莫敢言。毗曰。陛下欲徙士卒家其

計安出。帝曰。卿謂我徒之非耶。吾不與卿議。毗曰。陛下置臣謀議之官。安得不與之議耶。帝怒不荅。起入內。毗隨引其裾。帝遂奮衣而還。良久乃出曰。卿持我何太急耶。毗曰。今徒既失民心。又無以食。必將為寇也。帝遂徙其半。

晉傳玄為諫官。武帝即位。承魏末士風頽敝。玄上疏曰。臣聞先王之御天下。教化隆於上。清議行於下。近者魏武好法術。而天下貴刑名。

魏文慕通達而天下賤守節。而後綱維不攝。放誕盈朝。遂使天下無復清議。陛下龍興受禪。弘堯舜之化。惟未舉清遠有禮之臣。以敦風節。未退虛鄙之士。以懲不恪。臣是以猶敢有言。帝嘉納之。

南宋何尚之。文帝擢為尚書右僕射。時帝行幸還多侵夕。尚之表諫曰。萬乘宜重尊。不可輕此聖心。所鑒。豈假臣啓。輿駕比出。還多冒夜。群情傾懼。實有未寧。清道而動。帝王成則。古

今深戒安不忘危。若值汲黯辛毗。必將犯顏切諫。臣等碌碌。每存順默耳。伏願少采愚誠。思垂省察。以慰四海之望。優詔納之。

後魏張白澤。文帝時為雍州刺史。太和初。懷州民依邾三十餘人首作亂。將殺刺史。文明皇后欲盡誅一城之民。白澤諫曰。臣聞上天愛物之生。明王重民之命。故殺一人而取天下仁者不為。且書云。父子兄弟罪不相及。今羣凶肆虐。輒裂誅盡。合城無辜。柰何。極辟不誣。

一室。而況一州。或有忠焉。或有仁者。若淫刑
濫及。殺忠與仁。斯乃西伯所以歎息於九侯。
孔子所以迴輪於河上。伏惟聖德昭明。殷鑒
水鏡。止迅烈之怒。抑雷霆之威。則普天知幸
矣。昔厲防民口。卒滅宗姬。文聽輿頌。終摧強
楚。顛不以人廢言。留神省察。從之。

崔挺為光州刺史時。孝文以犯罪配邊者多。
有逃越。遂立重制。一人犯罪。逋亡。合門充役。
挺上書以為周書父子罪不相及。天下善人。

少惡人多。以一人犯罪延及合門。司馬牛受
桓魋之罰。柳下惠嬰盜跖之誅。豈不哀哉。辭
甚雅切。帝嘉納之。

唐魏徵貞觀中拜特進知門下省事時文德皇
后既葬昭陵太宗即苑中作層觀以望之引
徵同升。徵熟視曰。臣昏眊不能見。帝指視之。
徵曰。此昭陵耶。帝曰。然。徵曰。臣以為陛下望
獻陵。若昭陵。臣固見之。帝泣為毀觀。○帝嘗
從容問徵曰。比政治若何。徵見久承平。帝意

有所忽。因對曰。陛下貞觀之初。集人使諫。三年以後。見諫者悅而從之。比一二年。勉強受諫而終不平也。帝驚曰。公何物驗之。對曰。陛下初即位。論元律師死。孫伏伽諫。以為法不當死。陛下賜以蘭陵公主園直百萬。或曰。賞太厚。答曰。朕即位。未有諫者。所以賞之。此集人使諫也。後柳雄妄訴隋資。有司劾其偽。將論死。戴胄奏罪當徒。執之四五。然後赦之。謂胄曰。第守法如此。不謂濫罰。此悅而從諫也。

近皇甫德參上書言脩洛陽宮勞人收地租
厚歛俗尚高髻宮中所化陛下恚曰是子使
國家不役一人不收一租官人無疑乃稱其
意臣言人臣上書言不激切不能起人主意
激切即近訕謗于時陛下雖從臣言賞帛罷
之。意終不平。此難於受諫也。帝悟曰。非公無
能道此者。人苦不自覺耳。

房玄齡為司空時。太宗欲討高麗。群臣莫敢
諫。玄齡上疏曰。邊夷醜種。不足待以仁義。責

以常禮。古者以禽魚畜之。且陛下每決死罪。必三覆五奏。重人命也。今士無一罪。驅之行陣之間。委之鋒鏑之下。使肝腦塗地。老父孤子。寡妻慈母。望檣車。抱枯骨。摧心掩泣。其所以變動陰陽。傷害和氣。實天下之痛也。臣願下沛然之詔。許高麗自新。即臣死。骨不朽。帝得疏。謂高陽公主曰。是已危懼。尚能憂吾國家事乎。時玄齡病篤。帝故有此言。

褚遂良為諫議大夫。以太宗欲伐高麗。進諫。

曰。陛下兵機神筭。人莫能知。昔隋末亂離。克平寇難。及北狄侵邊。西蕃失禮。陛下欲命將擊之。羣臣莫不苦諫。唯陛下明畧獨斷。卒並誅夷。今聞陛下將伐高麗。意皆笑惑。然陛下神武英聲。不比周隋之主。兵若渡遼。事須克捷。萬一不勝。無以威示遠方。必更發怒。再動兵衆。若至於此。安危難測。帝征高麗。果不利。劉仁軌。太宗時為櫟陽丞。貞觀十四年。帝欲幸同州校獵。仁軌上疏曰。四時蒐狩。前王常

典事有沿革。未必因循。今年甘雨應時。秋稼甚盛。盡力收穫。月半猶未畢功。貧家無力。禾下始擬種麥。直據尋常科喚田家。已有所妨。今既祇供頻事。無之脩理橋道。縱大簡畧。動費一二萬工。百姓收斂。實為狼狽。臣願陛下少留萬乘之尊。垂聽一介之說。退延旬日。收刈總了。則人盡閒暇。家得康寧。鸞鳥與徐勣。公私交泰。帝降璽書勞之。

素利貞。高宗時為太常博士。永隆二年正月。

以太子初立獻食。勅於宣政殿會百官及命婦。利貞上疏曰。伏以恩旨宣政殿上。兼設命婦坐位。九部伎及散樂。並從宣政殿門入。臣以前殿正寢。非命婦宴會之處。象闕輅門。非倡優進御之所。望請命婦會於別殿。九部伎從東西門入。散樂一色。伏望停省。若於三殿別所。自可備極恩私。微臣忝預禮司。不敢不奏。輕陳狂瞽。願垂省察。帝從之。至會日。羣臣樂飲。帝使中書侍郎薛元超賜利貞百段錦。

綵

李善感為監察御史裏行。高宗既封泰山。欲遍封五嶽。善感諫曰。數年以來。菽粟不稔。餼殍相望。四夷交侵。兵車歲駕。陛下宜恭默思道。以禳災譴。乃更廣營宮室。勞役不休。天下莫不失望。帝是其言。自褚遂良韓瑗之死。中外以言為諱。幾二十年。及善感始諫。天下皆喜。謂之鳳鳴朝陽。

韓朝宗睿宗時為左拾遺。景雲中。令諸惡少

作乞寒胡戲。朝宗上疏諫曰。臣聞之傳曰。昔
辛有過伊川。見被髮於野者。曰。不及百年。此
其為戎乎。其禮先亡矣。後秦晉遷陸渾之戎
于伊川。以其中國之人習戎狄之事。一言以
貫百代。可知。竊惟今之乞寒濫觴胡俗。臣近
聽物議。咸言非古。伏願陛下三思。籌其所以
又道路籍籍。咸云皇太子微服親觀此戲。且
元良國本。蒼生是賴。輕此馳驟。能無蹙蹙。況
匈奴密發。亦何可限。或卒然奔波掩襲。無備

邂逅驚擾。則憂在不測。白龍魚服。取困豫且。深可畏也。況天象變見。疫癘相仍。戢兵助陰。是謂無益。帝稱善。

張九齡為中書令。玄宗以武惠妃之譖。將廢太子瑛。九齡奏曰。陛下纂嗣鴻業。將三十年。太子已下。常不離深宮。日受聖訓。今天下之人。皆慶陛下享國日久。子孫蕃育。不聞有過。陛下柰何以一日之間。廢棄三子。且太子國本。難於動搖。昔晉獻公惑寵嬖之言。太子申

生憂死國乃大亂。漢武威加六合。受江充巫蠱之事。禍及太子。遂至城中流血。晉惠帝有賢子為太子。容賈后之譖。以至喪亡。隋文帝取寵婦之言。廢太子勇。而立晉王廣。遂失天下。由此而論之。不可不慎。今太子既長。無過二王又賢。臣待罪左右。敢不詳悉。帝默然。事且寢。

顏真卿事代宗。時宰相元載多引私黨。畏羣臣論奏。乃紹帝曰。羣臣奏事。多挾讒毀。請每

論事皆先白長官。長官以白宰相。詳可否。以聞真卿上。疏曰。諸司長官皆得專達於天子。郎官御史。陛下腹心耳目之臣也。故出使天下。事無細大得失。皆俾訪察。還以聞。此古明四目達四聰也。今陛下欲自屏耳目。使不聰明。則天下何望焉。陛下省察其言虛誣。則讒人也。宜誅殛之。其言不誣。則正人也。宜獎勵之。帝詔可。

陸贄為翰林學士。德宗時有獻瓜果者。帝嘉

其意欲授以試官。贄曰：爵位天下公器，不可輕也。帝曰：試官虛名，且已與宰相議矣。卿其無嫌。贄奏：信賞必罰，霸王之資也。輕爵褻刑，衰亂之漸也。非功而獲爵，則輕；非罪而肆刑，則褻。今獻瓜果則授之，彼忘軀命者有以相謂矣。曰：吾之軀命乃同瓜果，人何勸哉？田夫野人必欲得其歡心，厚賜之可也。

陽城為諫議大夫。德宗時，陸贄罷相，會旱，裴延齡奏：贄失勢，怨望，言天旱民流，度支多欠。

諸軍芻糧動搖衆心於是貶贄為忠州別駕。帝怒猶未解。中外惴恐以為罪且不測。無敢救者。城即帥諫官守延英門上疏論延齡姦佞。贄無罪。帝大怒欲斬之。太子為營救乃解。時朝夕相延齡。城曰。脫有以延齡為相當取白麻壞之。慟哭於庭。乃盡數延齡過惡以聞。宋趙普為相。嘗有武臣立功當遷者。太祖素嫌惡其人。不與。普堅以為請。帝怒曰。朕固不為遷官。將若何。普曰。刑以懲惡。賞以酬功。古今

之通道也。且刑賞者。天下之刑賞。非陛下之刑賞。豈得以喜怒專之。帝怒甚。起。普亦隨之。帝入宮。普立於宮門。久之不去。帝悟。乃可其奏。

王旦為宰相。真宗時。禁中火。災。馳入對曰。臣備位宰府。天災如此。臣當罷免。繼上表待罪。帝乃降詔罪已。許中外上封事言朝政得失。後有大臣言非天災。乃禁王宮失於火禁。請置獄。出其狀。當斬決者數百人。旦持以歸。翌

日乞獨對。曰：初火災，陛下降詔罪己，臣上表待罪。今反歸咎於人，何以示信？且火雖有跡，寧知非天譴耶？果欲行法，類罪臣以明無狀。帝欣然聽納，減死者數百輩。

孫奭知河陽時，永興軍言朱能得天書，真宗自拜迎入宮。奭上疏切諫，以為天且無言，安得有書？天下皆知能所為，惟陛下一人不知耳。乞斬能以謝天下，頃之，能果敗。

尹洙，仁宗時通判泰州。西夏叛命，洙上言命

今者人主所以取信於下也。今朝廷降一命令。民間相與竊語。以為不久當更。既而信然。此命令數更之弊也。爵賞陛下所持之柄也。近時外戚內臣。以及士人。或因緣以求恩澤。從中而下。謂之內降。此恩寵過濫之弊也。賜予者。國家所以勸功也。比年以來。嬪御伶官。太醫之屬。賜予過厚。此賜予不節之弊也。臣願陛下先正於內。以正於外。然後忠謀漸進。紀綱漸舉。國用漸足。士心漸奮。邊境之患。庶

乎息矣。帝嘉納之。

傳堯俞英宗時為右司諫同知諫院。帝初躬庶政。猶謙讓任大臣。堯俞言大臣之言非是。陛下偶以為然而行之可也。審其非。從而徇之。則人主之柄安在。願君臣之際。是是非非。毋相面從。總覽衆議。無所適莫。則威柄歸陛下矣。嘗因論事。帝曰。卿何不言蔡襄對曰。若襄有罪。陛下何不自正典刑。安用臣言。帝曰。欲使臺諫以公議出之。對曰。若付之公議。臣

但見襄辨山陵事有功。不見其罪。臣身為諫官。使臣受旨言事。臣不敢也。

司馬光既拜相。言高居簡不宜在左右。哲宗曰。祔廟畢。自當去。光曰。閭閻小臣。何與山陵先後。彼知當去。而置肘腋。尤非宜。舜去四凶。不為不忠。仁宗貶丁謂。不為不孝。居簡狡猾。膽大。不惟離間君臣。恐令陛下母子兄弟夫婦皆不寧也。及崇政登對。又言臣與居簡勢不兩留。乞罷除外任。帝曰。今日已令出外矣。

陳道輔高宗時擢左司諫言中興之治在得天得人。以孝感天。以誠得民。帝善其深得諫臣體。賜五品服。令尚書省寫圖進入。以便觀覽。

胡銓高宗時為編脩官。宰臣秦檜決策與金人講和。王倫使金。與金使偕來。銓抗疏以為陛下一屈膝。則祖宗廟社盡汚夷狄。祖宗之赤子盡為左衽。朝廷宰執皆為陪臣。異時豺狼無厭。安知其不加以無禮如劉豫。夫三

尺童子無知。指犬豕而使之拜。則怫然怒。堂堂天朝。相率而拜犬豕。曾無童稚之羞耶。王倫誘致北使。以詔諭江南為名。是欲臣妾我也。執政孫近附會秦檜。肉食鄙夫。萬口一辭。牢不可破。臣義不顧與檜等共戴天。乞斬倫檜近三人頭。竿之藁街。然後羈其使。責以無禮。徐興問罪之師。則三軍之士不戰而氣自倍。不然。臣有蹈東海而死耳。寧能處小朝廷求活耶。

彭龜年光宗時除起居舍人嘗奏臣所居之
官以記注人君言動為職車駕不過重華間
壽皇安如此書者又數十矣恐非所以示後
有旨幸玉津園龜年奏不奉三宮而獨出宴
遊非禮也又言陛下誤以臣充嘉王府講讀
官正欲臣等教以君臣父子之道臣聞有身
教有言教陛下以身教臣以言教者也言豈
若身之切哉

楊宏中補國子生寧宗時韓侂冑竊弄國柄

引將作監李沐為右正言。首論罷右相趙汝愚。中丞何澹。御史胡紘。章繼上。竄汝愚。永州國子祭酒李祥。博士楊簡。連䟽抅爭。俱被斥。宏中與林仲麟。徐範。張衡。蔣傳。周端朝五人上書曰。自古國家禍亂之由。初非一道。惟小人中傷君子。其禍尤慘。願精加宸慮。特奮霄斷。念汝愚之忠勤。察祥簡之非黨。灼李沐之回邪。明示好惡。旌別湫慝。竄沐以謝天下。還祥簡以收士心。侂冑怒。送太平編管。天下踴

為六君子云

元王磐為宰相。世祖欲伐日本。師行有期。磐入諫曰。日本小夷。海道險遠。勝之則不武。不勝則損威。臣以為勿伐。便帝震怒。謂非所宜言。此在吾國。法言者不赦。汝豈有他心而然耶。磐對曰。臣赤心為國。故敢以言。苟有他心。何為從叛亂之地。冒萬死而來歸乎。今臣年已八十。況無子嗣。他心欲何為哉。明日帝遣侍臣以溫言慰撫之。

董士選為御史中丞。成宗用帥臣劉深言出師征八百媳婦國。遠冒煙瘴。士卒死者十七八。驅民轉粟餉軍。死者亦數十萬。中外騷然。廷臣無敢諫者。士選率同列言之。奏事殿中。畢。同列皆起。士選乃獨言。劉深出師以有用之民而取無用之地。就令當取。亦必遣使諭之。諭之不從。然後聚糧選兵。視時而動。豈得輕用一人妄言而致百萬生靈於死地。帝色變。士選猶明辯不止。侍從皆為之戰慄。帝曰。

事已成。卿勿復言。士選曰。以言受罪。臣之所當。他日以不言罪臣。臣死何益。帝麾之起。未數月。帝聞師敗績。慨然曰。董士選之言驗矣。吾愧之。因賜上尊。以旌直言。為罷兵誅深。

阿沙不花。武宗嘗御五花殿。丞相塔思不花。三寶奴等侍。阿沙不花見帝容色日悴。乃進曰。八珍之味。不知御。萬金之身。不知愛。惟麴蘖是好。姬嬪是耽。是猶兩斧伐孤樹。未有不顛仆者。帝喜曰。非卿孰為朕言。因命進酒。又

頻首曰。臣方欲陛下節飲而反勸之。是臣之言不信於陛下也。臣不敢奉詔。左右皆賀帝得直臣。遂拜右相。

彈劾

漢東方朔武帝時為中郎。帝姑館陶公主近幸董偃入見。帝置酒宣室。是時朔陞戟殿下。辟戟而前曰。偃有斬罪三。安得入乎。上曰。何謂也。朔曰。偃以人臣私侍公主。其罪一也。敗男女之化。而亂婚姻之禮。傷王制二也。陛下富

於春秋。方積思於六經。留神於王事。馳驚於唐虞。折節於三代。偃不遵經。勸學反以靡麗。為右奢侈。為務盡狗馬之樂。極耳目之欲。行邪枉之道。徑淫辟之路。乃國家之大賊也。帝默然不應。久之。乃曰。善。賜朔黃金三十斤。

王尊成帝時為司隸校尉。時石顯等以罪免。歸故郡。死。尊劾奏丞相匡衡。御史大夫張譚。知顯等專權擅勢。大作威福。為海內患害。不以時白奏行罰。而阿諛曲從。附下罔上。懷邪。

迷國無大臣輔政之義。於是衡慚懼免冠謝罪。上丞相侯印綬。

鮑永光武時為司隸校尉。帝姊父趙王良尊戚貴重。永以事劾良大不敬。朝廷肅然。莫不戒慎。乃辟扶風鮑恢為都官從事。恢亦抗直不避強禦。帝曰。貴戚且歛手以避二鮑。其見憚如此。

張陵。桓帝朝為尚書。歲首朝賀。大將軍梁冀帶劔入省。陵呵叱令出。勅羽林虎賁奪冀劔。

冀跪謝。陵不應。即劾奏冀請廷尉論罪。詔以一歲俸贖之。百僚肅然。

晉傅咸。武帝時為尚書左丞。時司隸荀愷從兄喪。自表赴哀。詔許之。而未下。愷乃造楊駿。咸因奏曰。死喪之威。兄弟孔懷。同堂亡殯。方在信宿。聖恩矜憫。聽使聞喪。詔未下而便造楊駿。急諂媚之敬。無友于之情。宜加顯貶。以隆風教。雖有詔不問。駿甚憚之。

卞壺。懷帝時拜尚書令。切直不畏強禦。王道

稱疾不朝而私送車騎將軍郗鑒壺奏導爵
法從私無大臣之節御史中丞鍾雅阿撓王
典不加準繩並請免官事雖不行舉朝震肅
傅玄為司隸校尉天性峻急每有奏劾或值
日暮捧白簡整簪帶竦踊不寐坐而待旦於
是貴游懾伏臺閣生風

隋郎茂為尚書左丞工部尚書宇文愷右翊衛
大將軍于仲文競河東銀窟茂奏劾愷爵位
已隆祿賜優厚技藝去織窠爾無聞求利下

交。曾無愧色。仲文大將宿衛近臣。趨侍墻庭。朝夕聞道。虞芮之風。抑而不慕。分銖之利。知而必爭。何以貽範庶僚。示人軌物。愷與仲文竟坐罪。

唐韋思謙。高宗時為監察御史。嘗曰。御史出使。不能動搖山岳。震懾州縣。為不任職。中書令褚遂良市地不如直。思謙劾之。罷為同州刺史。及復相。出思謙清水令。或吊之。荅曰。吾猶直。觸機輒發。暇恆身乎。丈夫當敢言地。須要

明目張膽以報天子。焉能碌碌保妻子耶。

王義方。高宗時擢侍御史。會李義府屬大理丞畢正義枉法出囚婦淳于氏將納為妾。事覺。逼正義縊死以滅口。無敢白其姦。義方上言。天子置公卿大夫士。欲水火相濟。鹽梅相成。不得獨是獨非也。今陛下撫萬邦而有之。蠻區夷落。罪無逃罰。況輦轂下。姦臣肆虐乎。殺人滅口。此生殺之柄。不自主出。而下移佞臣。履霜堅冰。彌不可長。請下有司雜治。正義

死狀。即具法冠對仗叱義府下。跪讀所言。人皆憚之。

狄仁傑為侍御史。左司郎中王本立怙寵自肆。仁傑劾奏其惡。武后有詔原之。仁傑曰。朝廷借乏賢。如本立者不貳。陛下惜有罪。虧成法。柰何。臣願先斥為羣臣戒。本立抵罪。繇是朝廷肅然。

李勉肅宗在靈武。擢為監察御史。時武臣崛興無法度。大將管崇嗣背闕坐笑。語諠縱。勉

王倫書卷三十三
三十一
劾其不恭。帝歎曰。吾有李勉。朝廷始尊。

顏真卿為御史大夫。時廣平王俶總兵二十萬平長安。辭日當關不敢乘。趨出陞柩乃乘。王府都虞候管崇嗣先王而騎。真卿劾之。肅宗還其奏。慰荅曰。朕子每出。諄諄教戒。故不敢失。崇嗣老而驕。卿姑容之。百官肅然。

溫造。穆宗時授侍御史。彈擊無所回畏。夏州節度使李祐拜大金吾。違詔進馬。造即劾之。祐曰。吾夜入蔡州。擒吳元濟。未嘗心動。今日

膽落於溫御史矣

歸融文宗開成初拜御史中丞時湖南觀察使盧周仁以南方屢火取羨錢億萬進京師融劾奏天下一家中外之財皆陛下府庫周仁陳小利假異端公違詔書徇私希恩恐海內效之因緣漁利生人受弊罪始周仁請重責還所進帝乃詔置其錢於河陰院以虞水旱

宋唐介仁宗時殿中侍御史張堯佐驟除宣徽

節度景靈羣牧四使。介與包拯吳奎等力爭之。又請中丞王舉正留百官班廷論奪其二。使無何復除宣徽使知河陽。介謂同列曰。是欲與宣徽而假河陽為名耳。不可。但已也。同列依違。介獨抗言之。帝謂曰。除擬本出中書。介遂劾宰相文彥博守蜀。日造間。金奇錦緣。內侍通宮掖以得執政。今顯用堯佐益自固結。請罷之。而相富弼又言諫官吳奎表裏觀望。語甚切直。帝怒却其奏。不視。且言將遠竄。

介徐讀畢曰。臣忠憤所激。鼎鑊不避。何辭於
謫。帝急召執政示之曰。介論事是其職。至謂
彥博由妃嬪致宰相。此何言也。時彥博在前。
介責之曰。彥博宜自省。即有之。不可隱。彥博
拜謝不已。帝怒益甚。梁適叱介使下殿。脩起
居。注蔡襄趨進救之。貶介春州別駕。王舉正
以為太重。帝旋悟。明日取其疏入。改置英州。
而罷彥博相。介由是直聲動天下。

鞠詠。仁宗時為監察御史。錢惟演自亳州來。

朝圖入相。詠奏惟演。險。嘗與丁謂為婚姻。緣此大用。後揣知謂姦狀已萌。懼牽連得禍。因此力攻。謂。今若以為相。必大失天下望。帝遣內侍持奏示之。惟演猶顧望不行。詠語諫官劉隨曰。若相惟演。當取白麻廷毀之。惟演聞之。乃亟去。

趙抃。仁宗朝為殿中侍御史。彈劾不避權倖。聲稱凜然。京師目為鐵面御史。其言務欲朝廷別白君子小人。以謂小人雖小過。當力遏。

而絕之。君子不幸註謬。當保全愛惜以成就其德。

司馬光知諫院。英宗立。遷都知任守忠等官。光爭論守忠大姦。陛下為皇子非守忠意。沮壞大策。離間百端。賴先帝不聽。及陛下嗣位。反覆交構。國之大賊。乞斬於都市以謝天下。於是罪守忠為節度副使。安置蘄州。天下快之。

張戢。神宗熙寧初為監察御史裏行。累章論

王安石亂法。乞罷條例司。及追還常平使者。劾曾公亮。陳升之。趙抃。依違不能救正。韓絳左右徇從。與為死黨。李定以邪諂竊臺諫。且安石擅國。輔以絳之詭隨。臺臣又用定輩。繼續而來。芽蘖漸盛。呂惠卿刻薄辯給。假經術以文姦言。豈宜勸講君側。書數十上。又詣中書爭之。安石舉扇掩面而笑。戲曰。戲之狂直。宜為公笑。然天下之笑公者不少矣。趙抃從旁解之。戲曰。公亦不得為無罪。抃有愧色。

劉摯神宗朝為監察御史裏行。即奏論亳州獄起。小人意在傾富弼。以市進。今弼已得罪。願少寬之。又言程昉開漳河。調發猝迫。人不堪命。趙子幾擅升畿縣等使。納役錢。縣民日數千人。遮訴宰相。京師喧然。何以示四方。張靚王廷老擅增兩浙役錢。督賦嚴急。人情嗟怨。此皆欲以羨餘希賞。願行顯責。明朝廷本無聚斂之意。帝面賜褒賞。

王岩叟為監察御史。哲宗即位。蔡確為裕陵

復土使還朝以定策自居。若叟奏陛下之立以子繼父。百王不易之典。太皇太后先定於中。而確敢貪天自伐。章惇譏賊狼戾。罔上蔽明。不忠之罪。蓋與確等。近簾前爭役法詞氣不遜。無事上之禮。帝是其言。二人相繼退黜。蘇轍。括宗元祐初為右司諫。宣仁后臨朝。用司馬光。呂公著欲革弊事。而舊相蔡確韓縝樞密使章惇皆在位。窺伺得失。轍皆論去之。呂惠卿始諂事王安石。倡行虐政以害天下。

及勢均力敵。則傾陷安石。甚於仇讎。世尤惡之。至是自知不免。乞宮觀以避貶竄。轍具疏其姦。轍之論事切直多類此。

劉安世。哲宗朝擢為右正言。時蔡確雖貶。尚與章惇等創造語言。恐脅貴近。安世復言。蔡確。章惇與黃履。邢恕四人在元豐末。號為死黨。惇確執政。倡之於內。履為中丞。與其寮屬和之於外。恕立其間。往來傳送。天下之事在其掌握。聖上嗣位。實太后聖慮深遠。為宗廟

社稷無窮之計。彼四人者。乃敢貪天之功。以
為己力。伏望明詔執政。正四凶之罪。布告天
下。蔡確近已貶竄。而章惇黃履邢恕欲乞並
逐之。遠方終身不齒。由是三人亦皆得罪。

李安民為監察御史。論蔡京姦足以惑眾。辯
足以飾非。巧足以移奪人主之視聽。力足以
顛倒天下之是非。內結權貴。外連朝士。在廷
之臣。京黨過半。陛下何不早覺悟而逐去之。
待其羽翼成就。則悔無及矣。是時京之姦始

萌人多未測。而安民之言。前後皆驗。

陳俊卿高宗時為殿中侍御史。言人主以兼聽為美。必本至公。人臣以不欺為忠。必達大體。御下之道。恩威並施。抑驕將。作士氣。則綱紀正。而號令行矣。遂劾韓仲通。本以獄事附秦檜。寃陷無辜。檜黨盡逐。而仲通獨全。劉寶總戎京口。恣肆掊剋。且拒命不分戍。於是二人遂抵罪。

馬伸高宗時擢殿中侍御史。初奏孫覲謝克

家趣操不正。在靖康間。與王時雍。王及之等
七人結為死黨。乃負國之賊。宜加遠竄。又言
黃潛善。汪伯彥入相以來。處事未嘗愜當物
情。遂使女真日強。盜賊日盛。國本日蹙。威權
日削。宜速罷潛善。伯彥。政柄別選賢者共國
大事。疏入。以伸言不實。責濮州監酒稅。天下
惜之。

杜莘老為侍御史。嘗歎曰。臺諫當論天下第
一事。若有所畏。姑言其次。是欺其心。不敬其

君者也。及任言責，極言無隱，取衆所指目者，悉擊去之。內侍劉炎，僥禁中市易，大為姦利。萃老疏聞，即斥監嘉州稅，淮南運副王秬居官簞簞不飾。萃老劾罷之。辛鑒王繼先怙寵干法，富浮公室，屋擬禁庭，未有敢搖之者。萃老疏數其十罪，羈置繼先。福州子孫勒停，天下稱快。

五倫書卷之三十二